

CYNGOR SIR YNYS MÔN	
Pwyllgor:	Pwyllgor Sgriwtini Corfforaethol
Dyddiad:	15 Ionawr 2025
Testun:	Gwasanaeth Cynllunio at Argyfwng Rhanbarthol Cynghorau Gogledd Cymru (GCAR-CGC)
Pwrpas yr adroddiad:	Adroddiad Blynyddol 2023/2024
Cadeirydd y Pwyllgor Craffu:	Cynghorydd Douglas Fowle
Deiliad Portffolio:	Cynghorydd Gary Pritchard
Pennaeth Gwasanaeth:	Dylan Williams, Prif Weithredwr
Awdur yr Adroddiad:	Helen Kilgannon, Rheolwr Rhanbarthol GCAR-CGC Helen.Kilgannon@nwc-reps.org.uk Susan Owen Jones, Rheolwr Gweithredol (TA) SusanJones4@ynysmon.llyw.cymru Jon Zalot, Swyddog Cynllunio Rhag Argyfwng Jon.Zalot@nwc-reps.org.uk
Aelodau Lleol:	Yn berthnasol i'r holl aelodau

1 - Argymhelliad

1.1 Gofynnir i'r Pwyllgor nodi cynnydd gwaith Gwasanaeth Cynllunio at Argyfwng Rhanbarthol Cynghorau Gogledd Cymru 2023/24.

2 – Cyswllt i Gynllun y Cyngor / Blaenoriaethau Corfforaethol Eraill

2.1 Mae'n gyfrifoldeb ar y Cyngor i gynllunio rhag argyfwng ac ymateb o dan Ddeddf Argyfyngau Sifil Posibl 2004, Rheoliadau Ymbelydredd (Parodrwydd am Argyfwng a Gwybodaeth Gyhoeddus) 2001, a Rheoliadau Diogelwch Piblinellau 1996.

2.2. Mae'r Cyngor yn ymatebwr allweddol ac yn diwallu ei rwymedigaethau drwy gydweithio ag Awdurdodau Lleol Gogledd Cymru drwy Wasanaeth Cynllunio at Argyfwng Rhanbarthol (GCAR-CGC) Cynghorau Gogledd Cymru.

2.3 Mae'n ofynnol bod Gwasanaeth Cynllunio at Argyfwng Rhanbarthol Cynghorau Gogledd Cymru yn adrodd yn flynyddol i'r pwyllgor hwn bob blwyddyn, drwy gyfrwng Adroddiad Blynyddol.

3 – Egwyddorion Arweiniol i Aelodau Craffu

Cynorthwyo Aelodau gyda chraffu ar destun:-

3.1 Effaith y mater ar unigolion a chymunedau [canolbwyntio ar y cwsmer/ dinesydd]

3.2 Ystyried effeithlonrwydd ac effeithiolrwydd unrhyw newid arfaethedig – yn ariannol ac o ran ansawdd [canolbwyntio ar werth]

3.3 Ystyried unrhyw risgiau [canolbwyntio ar risgiau]

3.4 Y Pwyllgor Craffu yn cymryd rôl monitro perfformiad neu sicrhau ansawdd [canolbwyntio ar berfformiad ac ansawdd]

3.5 Ystyried cynlluniau a chynigion o safbwynt:

- Hirdymor
- Atal
- Integreiddio
- Cydweithio
- Cyfranogi

[canolbwyntio ar les]

4 - Cwestiynau Craffu Allweddol

4.1 I ba raddau y bu i'r gwasanaeth rhanbarthol gyflawni ei swyddogaethau a'i nodau allweddol ar gyfer 2023/2024?

4.2 Beth yw blaenoriaethau allweddol uniongyrchol y gwasanaeth i gefnogi'r Cyngor a Gogledd Cymru?

5 – Cefndir / Cyd-destun

2.1 Mae gan y Cyngor ddyletswyddau i gynllunio rhag argyfwng ac ymateb o dan Ddeddf Argyfyngau Sifil Posibl 2004, Rheoliadau Ymbelydredd (Parodrwydd am Argyfwng a Gwybodaeth Gyhoeddus) 2001, a Rheoliadau Diogelwch Piblinellau 1996.

5.2. Mae'r Cyngor yn ymatebwr allweddol ac yn diwallu ei rwymedigaethau drwy gydweithio ag Awdurdodau Lleol Gogledd Cymru drwy Wasanaeth Cynllunio at Argyfwng Rhanbarthol (GCAR-CGC) Cyngorau Gogledd Cymru, a Chyngor Sir y Fflint yw'r awdurdod lletyol.

5.3 Yn dilyn ymgynghoriad a chadarnhad drwy'r broses wleidyddol ym mhob Awdurdod Lleol, cafodd swyddogaethau Cynllunio Rhag Argyfwng pob un o'r 6 awdurdod lleol yng Ngogledd Cymru eu cyfuno'n un gwasanaeth dan gytundeb rhwng awdurdodau, a gynhaliwyd gan Sir y Fflint yn 2014.

5.4 O fewn y Cyngor, caiff cyfrifoldebau dros gynllunio rhag argyfwng ac ymateb eu rhannu ar draws gwasanaethau a phennir cynrychiolwyr gwasanaeth penodol o fewn strwythur y Tîm Ymateb a Rheoli Argyfwng.

5.5 Yn dilyn ein hadroddiad diwethaf, rydym wedi datblygu'r system rheoli perfformiad ac yn ei phrofi ar hyn o bryd, cyn i ni uwchlwytho'r holl ddata. Mae'r gronfa ddata Hyfforddiant wedi'i datblygu ac rydym yn casglu'r wybodaeth gan y chwe awdurdod lleol, er mwyn sicrhau bod gennym gofnod cywir o hyfforddiant a datblygiad aelodau staff awdurdodau lleol.

Gweithgarwch Rhanbarthol

5.6 Mae'r GCAR-CGC yn parhau i fod y prif gyswllt rhwng y Cyngor a Fforwm Lleol Cymru Gydnerth y Gogledd, ac mae cyfraniadau gan staff y gwasanaeth yn hanfodol i grwpiau, digwyddiadau, prosesau a chynlluniau amlasiantaeth. Mae parhad yn cynnig mwy o fanteision, gan fod perthnasoedd yn cael eu meithrin â phartneriaid allweddol. Rydym yn ategu hyn drwy gynnal gweithdai gyda phartneriaid, fel bod modd iddynt gael gwell dealltwriaeth o beth yw'r Gwasanaeth, ac yn bwysicach fyth, yr hyn y mae'r Cyngor yn gyfrifol amdano mewn argyfwng.

5.7 Roedd aelodau staff GCAR-CGC yn allweddol o ran y gwaith o gynllunio a hwyluso ymarfer llifogydd cronfeydd dŵr. Estynnir gwahoddiad i aelodau staff y Cyngor fynychu, i rannu'r hyn a ddysgwyd a chymryd rhan yn y senario.

5.8 GCAR-CGC yw'r sefydliad arweiniol o ran galwadau gan y Sector Gwirfoddol mewn Argyfwng. Bu aelodau staff GCAR-CGC yn hwyluso digwyddiad a oedd yn arddangos gallu'r sector gwirfoddol ym Mharc Eirias, Bae Colwyn. Yn dilyn y digwyddiad, mae rhagor o waith wedi'i wneud gan y tîm i fapio adnoddau partneriaid y sector gwirfoddol, er mwyn targedu ymateb a chefnogaeth yn well.

5.9 Mae'r GCAR-CGC yn parhau i gynnig cymorth y tu allan i oriau i'r awdurdod lleol a gwasanaethau golau glas, mewn ymateb i ymholiadau a digwyddiadau 24 awr y dydd, 365 diwrnod y flwyddyn. Er mwyn profi ymatebion o fewn awdurdodau lleol, mae'r GCAR-CGC yn cynnal Ymarfer Cooper bob chwarter, er mwyn profi'r manylion cyswllt sydd gennym ac argaeledd y tu allan i oriau aelodau staff allweddol. Rhennir y canlyniadau â'r Bwrdd.

5.10 Mae'r gwasanaeth yn gweithio gyda Fforwm Lleol Cymru Gydnerth y Gogledd, er mwyn darparu nifer o Gyrsiau Hyfforddi, megis hyfforddiant cofnodi, a hwyluso'r Hyfforddiant JESIP amlasiantaeth. Mae Dadansoddiad o Anghenion Hyfforddiant ar gyfer partneriaid wedi'i ddsbarthu i'r Cyngor, i'w adolygu a'i gwblhau, er mwyn sicrhau ein bod yn cynnig cyrsiau sy'n diwallu anghenion aelodau staff. Bydd hyn yn caniatáu i'r gwasanaeth flaenoriaethu meysydd gwaith a dyrannu adnoddau yn effeithiol, yn ogystal â sicrhau bod y Cyngor yn elwa'n llwyr o'r ystod o arbenigedd sydd gan y gwasanaeth.

5.22 Trefnodd y GCAR-CGC nifer o weithdai llawn gwybodaeth gyda siaradwyr gwadd sydd wedi arwain ymatebion awdurdodau lleol i'r digwyddiadau canlynol:

Ymosodiad Arena Manceinion

Tân ym Mhencadlys De Swydd Rydychen

Ymosodiad Novichok yn Salisbury

Terfysgoedd Tottenham

Cafwyd adborth hynod gadarnhaol yn y sesiynau hyn, ac roedd yn gyfle i'r Cyngor weld goblygiadau digwyddiadau ac elwa o fyfyrion ar y digwyddiad a'r ymateb.

Gweithgarwch o fewn y Cyngor

5.23 Mae gwaith wedi mynd rhagddo dros y flwyddyn ddiwethaf ar gynllun wrth gefn ar gyfer cau pontydd. Ar ôl i'r Prif Weithredwr godi'r mater gyda Fforwm Lleol Cymru Gydnerth y Gogledd, cafodd grŵp tasg a gorffen ei sefydlu, er mwyn ymchwilio i'r mater. Roedd y grŵp yn cael ei gadeirio gan Asiantaeth Cefnffyrdd Gogledd a Chanolbarth Cymru yn y lle cyntaf, cyn i'r awenau gael eu trosglwyddo i'r GCAR-CGC. Nodwyd bod cynlluniau wrth gefn ar gyfer cau'r pontydd yn unigol, ond bod yr unig gynllun ar gyfer cau'r ddwy ar yr un pryd yn dyddio'n ôl i 2011. Dechreuwyd ar y gwaith o ddiweddarau'r ddogfen hon, fel bod pob asiantaeth sydd â rôl gysylltiedig â'r croesfannau neu sy'n dibynnu arnynt, yn rhestru eu dyletswyddau a'u cyfrifoldebau, pe bai'n rhaid eu cau. Diben hyn yw pennu disgwyliadau ar gyfer pob asiantaeth a chael cyfres graidd o gamau gweithredu i'w dilyn mewn digwyddiad.

5.24 Mae ymarfer canolfan orffwys caethwasiaeth fodern wrthi'n cael ei gynllunio ar gyfer 3 Chwefror 2025 yng Nghanolfan Hamdden Plas Arthur. Bydd yr ymarfer yn profi'r cynllun caethwasiaeth fodern sydd wedi'i ddatblygu gan Heddlu Gogledd Cymru, yn ogystal â gweithdrefnau canolfan orffwys awdurdodau lleol. Estynnir gwahoddiad i aelodau staff o'r gwasanaethau cymdeithasol, tai a hamdden. Datblygir yr ymarfer gyda mewnbwn gan Heddlu Gogledd Cymru a'r Swyddfa Gartref.

5.25 Mae'r gwasanaeth yn parhau i gefnogi a chynrychioli'r awdurdod ar lefel ranbarthol. Gwelwyd cynnydd bychan yn nifer y staff sy'n mynychu cyrsiau JESIP gweithredol a thactegol, a gynhelir gan Fforwm Lleol Cymru Gydnerth y Gogledd bob mis. Mae'r gwasanaeth hefyd yn annog prif swyddogion i fynychu Aur Cymru sy'n cael ei gynnal yn flynyddol. Caiff 2 le ei ddyrannu i bob awdurdod lleol. Mae'r awdurdod a'r gwasanaeth rhanbarthol hefyd yn mynychu grwpiau Cydlynu Tactegol, gan gefnogi CSYM.

5.26 Mae'r gwasanaeth cynllunio rhag argyfwng yn parhau i weithio ar safleoedd storio llygredd morol ar y cyd â thempled cynllun llygredd arfordirol rhanbarthol, gan ymgysylltu â Grŵp Budd-ddeiliaid Safle Wylfa a chymryd rhan yng Ngrŵp Diogelwch Ymgynghorol y Cyngor.

5.27 Mae cyrsiau E-ddysgu wedi'u cyflwyno ar Gronfa Ddysgu'r Cyngor. Mae'r cyrsiau'n parhau i hysbysu staff ac aelodau etholedig ynghylch rolau a chyfrifoldebau cynllunio rhag argyfwng. Mae cyrsiau canolfannau gorffwys wedi cael eu cwblhau dros 100 o weithiau, sy'n dangos bod aelodau staff yn cymryd rhan weithredol mewn hyfforddiant.

5.28 Mae'r GCAR-CGC yn rhan annatod o'r tîm cynllunio, sy'n bwrw golwg ar ddigwyddiadau ar y môr, mewn cydweithrediad â Gwylwyr y Glannau. Mae Fframwaith Ymateb Morol yn cael ei ddatblygu ac mae trefniadau'n cael eu gwneud i brofi'r fframwaith.

Mae'r Cyngor yn cynnal dull gweithredol o ran paratoi ar gyfer argyfwng, ac yn ymdrechu'n barhaus drwy hyfforddiant, cynllunio a chydweithio rhyngasiantaethol er mwyn sicrhau bod modd ymateb yn effeithiol.

5.29 Mae Cyngor Sir Ynys Môn yn cyfrannu £61,844 i'r gwasanaeth bob blwyddyn. Mae'r cyfraniad yn seiliedig ar gyfran o 10.472% tuag at gyllideb flynyddol y gwasanaeth. Ers iddo ddechrau, mae'r gwasanaeth wedi lleihau cyfraniadau'r 6 awdurdod lleol o dros

£300,000. Yn dilyn adolygiad gwasanaeth, mae gwaith pellach yn mynd rhagddo i ailgyfrifo costau gwasanaethau.

Awdurdod Lleol	Cyfraniad Blynyddol %
Cyngor Sir Ynys Môn	10.472%
Cyngor Bwrdeistref Sirol Conwy	16.940%
Cyngor Sir Ddinbych	14.865%
Cyngor Sir y Fflint	19.348%
Cyngor Gwynedd	17.979%
Cyngor Bwrdeistref Sirol Wreccsam	20.396%
Cyfanswm	100%

Fu

6 – Asesiad o Effaith ar Gydraddoldeb [gan gynnwys yr effaith ar y Gymraeg]

6.1 Effeithiau posibl ar grwpiau gwarchoddedig dan Ddeddf Cydraddoldeb 2010

Amherthnasol

6.2 Effeithiau posibl ar yr unigolion sydd dan anfantais economaidd-gymdeithasol yn eu bywydau (penderfyniadau strategol)

Amherthnasol

6.3 Effeithiau posibl ar gyfleoedd i bobl ddefnyddio'r Gymraeg a pheidio â thrin y Gymraeg yn llai ffafriol na'r Saesneg

Amherthnasol

7 – Goblygiadau Ariannol

7.1 Nid yw'r adroddiad yn nodi unrhyw oblygiadau ariannol penodol ar gyfer y Cyngor.

7.2 Mae'r Cyngor yn cyfrannu swm blynyddol o £61,844 i'r gwasanaeth.

8 – Atodiadau:

Gwasanaeth Cynllunio at Argyfwng Rhanbarthol Cyngorau Gogledd Cymru (GCAR-CGC) – Adroddiad Blynyddol 2023/2024.

9 - Papurau Cefndir (cysylltwch ag awdur yr Adroddiad am unrhyw wybodaeth bellach):



Adroddiad Blynyddol 2023/24

Dyma adroddiad blynyddol Gwasanaeth Cynllunio rhag Argyfwng Rhanbarthol Cyngorau Gogledd Cymru ar gyfer 2023-2024. Mae'n ymdrin â'r gwaith a gyflawnodd y Gwasanaeth yn y chwech o awdurdodau lleol yn y rhanbarth, yn ogystal â'r gweithgareddau amlasiantaethol i gefnogi Fforwm Lleol Cymru Gydnerth y Gogledd.

Gwasanaeth Cynllunio rhag Argyfwng Rhanbarthol Cyngorau Gogledd Cymru

enquiries@nwc-reps.org.uk
01352 702124



Gwasanaeth Cynllunio at Argyfwng Rhanbarthol Cyngorau Gogledd Cymru (y Gwasanaeth)

Mae Cyngor Sir Ynys Môn, Cyngor Gwynedd, Cyngor Bwrdeistref Sirol Conwy, Cyngor Sir Ddinbych, Cyngor Sir Y Fflint a Chyngor Bwrdeistref Sirol Wrecsam yn cydweithio mewn partneriaeth ers sefydlu Gwasanaeth Cynllunio rhag Argyfwng Rhanbarthol Gogledd Cymru yn 2014. Mae'r Gwasanaeth yn ymgymryd â swyddogaethau'r Cyngorau o ran argyfyngau sifil posibl ac mae'n atebol i Fwrdd Gweithredol sy'n cynnwys uwch-swyddogion o'r Cyngorau hynny.

Mae'r Gwasanaeth yn sicrhau fod Awdurdodau Lleol yn cydymffurfio â'r ddeddfwriaeth ganlynol:

- Deddf Argyfyngau Sifil Posibl 2004.
- Rheoliadau Rheoli Peryglon Damweiniau Mawr 2015.
- Rheoliadau Diogelwch Piblinellau 1996.
- Rheoliadau Ymbelydredd (Parodrwydd am Argyfwng a Gwybodaeth i'r Cyhoedd) 2019.

Nod y gwasanaeth yw:

- Lleihau dyblygu gwaith ac ailadrodd tasgau.
- Hybu cysondeb yng ngwaith y gwahanol dimau a meithrin eu cydnerthedd.
- Defnyddio'r adnoddau sydd ar gael yn well drwy rannu cefnogaeth arbenigol a thasgau cyffredin.
- Hybu cysondeb yn ymatebion awdurdodau lleol.
- Hwyluso sianeli cyfathrebu rhwng Fforwm Cymru Gydnerth y Gogledd ac awdurdodau lleol.



Rheoli Digwyddiadau

Mae'r Gwasanaeth yn cyflogi Swyddog ar Ddyletswydd 24/7 gydol y flwyddyn i weithredu fel pwynt cyswllt cyntaf wrth ymateb i argyfwng.

Ym mlwyddyn ariannol 2023-24, rhoes y Gwasanaeth gymorth â:

- **Derbyn ac asesu rhybuddion a hysbysiadau gan Gyfoeth Naturiol Cymru:**
 - 56 o Hysbysiadau o Lifogydd Cymunedol.
 - 181 o Hysbysiadau o Lifogydd.
 - 5 o Rybuddion Llifogydd Cymunedol.
 - 8 o Rybuddion Llifogydd.
 - 8 o Rybuddion Cynnar.
- **Derbyn, ac asesu Rhybuddion Tywydd gan y Swyddfa Dywydd:**
 - Gwynedd = 104 (100 melyn / 4 oren).
 - Conwy = 100 (95 melyn / 5 oren).
 - Ynys Mon = 68 (65 yellow / 3 Amber).
 - Sir Ddinbych = 92 (87 melyn / 5 oren).
 - Sir y Fflint = 78 (72 melyn / 6 oren).
 - Wrecsam = 86 (80 melyn / 6 oren).
- **Derbyn ac ymateb i adroddiadau o ddigwyddiadau, gan gynnwys:**
 - Digwyddiad oren oherwydd eira Chwefror 2024.
 - Storm Babet Hydref 2023.
 - Storm Isha Ionawr 2024.



Dysgu a Datblygu

Gwaith a gyflawnwyd ym mlwyddyn ariannol 23/24

I ddysgu gwersi gan awdurdodau lleol eraill sydd wedi wynebu digwyddiadau mawr/ argyfyngau, trefnodd y Gwasanaeth gyfres o weithdai i drafod y digwyddiadau canlynol:

- [Arena Manceinion.](#)
- [ân mewn pencadlys.](#)
- [Gwenwyno yn Salisbury.](#)

Daeth swyddog o'r awdurdod lleol dan sylw i bob gweithdy i ddisgrifio'r digwyddiad.

Bu'n addysgiadol i glywed am beth weithiodd yn dda wrth ymateb i'r digwyddiad a'r problemau a wynebwyd a bydd yn fuddiol i'n gwaith paratoi.

Daeth nifer dda o bobl i'r gweithdai, a oedd yn werthfawr iawn ac yn destun cryn ganmoliaeth.

E-ddysgu

Mae'r Uwch-swyddog Cynllunio at Argyfwng wedi adolygu'r 14 o fodiwlau i gyd ac maent bellach ar gael ar **Learning@Wales**. Drwy gael cronfa ddata bwrpasol, newydd ar gyfer hyfforddiant ac ymarferion bydd gennym gofnod mwy cywir o'r modiwlau sydd wedi'u cwblhau ac amserlen awtomatig ar gyfer hyfforddiant diweddarau.

- [Hyfforddiant ac Ymarferion.](#)
- [Aml-asiantaeth.](#)
- [Egwyddorion Rhyngweithredu Gwasanaeth Brys ar y Cyd \(JESIP\).](#)

Mae'r Gwasanaeth yn aelod blaenllaw o grŵp cynllunio a chyflawni JESIP ac yn cynorthwyo i drefnu pecynnau hyfforddiant Gweithredol a Thactegol.

- [JESIP Gweithredol.](#)
- [JESIP Tactegol / Arian Cymru.](#)
- [Hyfforddiant Cofnodi.](#)
- [Ymarferion.](#)

Toriad Trydan

Ymarfer i brofi effaith toriad trydan cyffredinol a magu cyd-ddealltwriaeth o'r goblygiadau i bartneriaid amlasiantaethol lleol wrth ymateb.

Aur Cymru

Ymarfer i baratoi arweinwyr strategol i weithio'n effeithiol mewn Grŵp Cydlynu Strategol a Grŵp Cydlynu Adferiad wrth ymateb i ddigwyddiad mawr ac adfer ar ei ôl.

Ymarfer Bardic Llif

Ymarfer cynllunio milwrol ar gyfer cefnogi awdurdodau sifil gyda gweithrediadau yn y Deyrnas Unedig. Rhoddwyd prawf ar allu Brigâd 160 (Cymru) i gynllunio amryw dasgau Cymorth Milwrol i Awdurdodau Sifil a'u cyflawni. Bu partneriaid sifil yn cynorthwyo'r Grŵp Cydlynu Strategol a Grŵp Rheoli'r Ymarfer yn ystod yr ymarfer byw hwn.

Ymarfer Electra

Bu nifer o aelodau tîm y Gwasanaeth a chydweithwyr mewn awdurdodau lleol yn rhan o'r ymarfer hwn, a drefnwyd gan Asiantaeth Cefnffyrdd Gogledd a Chanolbarth Cymru er mwyn dangos cydymffurfiaeth â gweithdrefnau argyfwng yn nhwnnel Pen-y-clip.

Ymarfer Tanau Gwyllt

Ym mis Mawrth 2024, bu'r Gwasanaeth yn cymryd rhan mewn cyfarfodydd ac ymarfer byw gan Wasanaeth Tân ac Achub Gogledd Cymru ar Foel Famau, ar y ffin rhwng Sir y Fflint a Sir Ddinbych.

Dysgu a Datblygu

Eraill

Ymarferion Canolfannau Gorffwys

Wedi inni gyflwyno'r Cynllun Canolfannau Gorffwys newydd yn llwyddiannus, roedd angen cynnal ymarferion i'w sefydlu ym mhob awdurdod lleol. Trefnwyd yr ymarferion mewn Canolfannau Gorffwys dynodedig ledled Gogledd Cymru. Dechreuodd yr ymarferer gyda chyflwyniad gan Gydlynnydd y Fforwm Lleol Cymru Gydherth ynglŷn â swyddogaeth y Fforwm yn ystod argyfyngau, a chyflwyniad gan Heddlu Gogledd Cymru a'r Gwasanaeth. Wedi hynny, esboniwyd y sefyllfa i bawb oedd yn bresennol. Rhoes hynny gyfle i bobl siarad am broblemau a allai godi wrth reoli canolfan orffwys.

Ar sail yr ymarferion hyn fe bennwyd camau gweithredu i Swyddogion Arweiniol Cynllunio rhag Argyfwng ac maent wrthi'n gweithio â'u cydweithwyr yn eu hawdurdodau lleol i gyflawni'r camau hynny, a sicrhau y bydd yr holl awdurdodau'n barod os bydd angen agor canolfan orffwys.

Ymarfer Cooper

Cynhaliwyd Ymarfer Cooper i brofi cywirdeb y wybodaeth mewn Cyfarwyddiaduron Cyswllt mewn Argyfwng awdurdodau lleol ynglŷn â staff oedd ar gael. Detholwyd 48 o aelodau o staff ar hap i wirio cywirdeb 107 o rifau cyswllt. Wedi'r ymarfer hwn, diwygiwyd y Cyfarwyddiaduron i gywiro'r wybodaeth.



Cyngor Bwrdeistref Sirol Conwy

Gwaith a gyflawnwyd ym mlwyddyn ariannol 2023 to 2024

Ymateb i ddigwyddiad mawr

Wedi mabwysiadu templed y Gwasanaeth, derbyniodd yr Uwch-reolwyr gyflwyniad ym mis Mawrth er mwyn gwreiddio'r Cynllun a'r strwythur. Bu'n gyfle hefyd i godi ymwybyddiaeth o waith y Gwasanaeth a chyfrifoldebau awdurdodau lleol dan Ddeddf Argyfyngau Sifil Posibl 2004. Ategwyd hynny drwy ymgysylltu ynghylch y rhaglenni hyfforddiant Aur Cymru a JESIP yn 2024.

Mae Grŵp Partneriaeth Llifogydd Dyffryn Conwy'n cwrdd unwaith bob chwarter ac mae'r Gwasanaeth yn darparu cadeirydd ar y gweithgor i ddatblygu Cynllun Ymateb i Amlasiantaethol i Llifogydd yn Nyffryn Conwy.

Bu Partneriaeth Llifogydd Cymunedol Morfa Rhuddlan yn canolbwyntio ar ymgynghori ynglŷn â'r amddiffynfeydd llifogydd arfaethedig.

Mae'r Gwasanaeth yn cymryd rhan yng nghyfarfodydd y Grŵp Rhaglen Ymateb i Seibrddigwyddiadau.

Rydym wrthi'n adolygu'r ddarpariaeth o ran Canolfannau Gorffwys a'r prosesau ar gyfer eu hagor, a byddwn yn cynnal profion ar ôl gorffen.

Gydol y flwyddyn bu'r Gwasanaeth yn gweithio â phartneriaid yng ngwasanaethau estynedig Cyngor Bwrdeistref Sirol Conwy a chynghorwyr lleol wrth gefnogi mwy na dau gant o ffoaduriaid drwy Grŵp Cymorth Adsefydlu Ffoaduriaid o Wcráin.

Rheoli Parhad Busnes

Cyflwynodd y Gwasanaeth becyn o ddogfennau i Gonwy er ymgynghoriad. Cynhaliwyd gweithdy ag uwch-reolwyr i adolygu'r Cynllun Parhad Busnes Corfforaethol a Chynlluniau unigol pob Gwasanaeth. Mae'r drafft terfynol o'r Cynllun Corfforaethol ar fin derbyn cymeradwyaeth yn sgil ei ddiwygio.

Mae'r Gwasanaeth yn cymryd rhan mewn cyfarfodydd Polisiâu, Safonau, Gweithdrefnau a Chanllawiau a Grwpiau Cynghori ar Ddiogelwch ac yn cynorthwyo aelodau'r grwpiau gyda'r goblygiadau i awdurdodau lleol yn sgil cyflwyno Cyfraith Martyn.

Gwaith sydd wedi'i gynllunio ar gyfer blwyddyn ariannol 2024/2025

- Mae gwaith yn mynd yn ei flaen gyda Chyfoeth Naturiol Cymru ac Adain Drwyddedu CBSC ynglŷn â threfniadau gwacau parciau carafanau a gwyliau.
- Mae'r Gwasanaeth yn cydweithio â Dŵr Cymru a CBSC wrth ddatblygu trefniadau dosbarthu dŵr. Mae'n rhaid gwneud hynny fel bod gwahanol ffyrdd o ddarparu a dosbarthu dŵr i'r cyhoedd os bydd Dŵr Cymru'n datgan digwyddiad mawr sy'n effeithio ar gynhyrchu neu ddsbarthu cyflenwad dŵr drwy bibellau (dŵr wedi'i drin ar gyfer cwsmeriaid domestig ac annomestig).



Cyngor Sir Ynys Môn

Gwaith a gyflawnwyd ym mlwyddyn ariannol 2023 to 2024

Cynlluniau wrth Gefn ar gyfer Pontydd

Pan gyfarfu Pwyllgor Craffu ym mis Hydref 2023, holodd aelodau pa gynlluniau wrth gefn oedd wedi'u gwneud ar gyfer sefyllfa lle byddai'r ddwy bont yn cau'n ddisymwth. Roedd ansicrwydd ynglŷn â materion pwysig fel mynediad i Ysbyty Gwynedd a loriau trymion yn creu tagfeydd. Rhoes y Gwasanaeth gefnogaeth i'r Prif Weithredwr drwy ysgrifennu llythyr at Gadeirydd y Fforwm Lleol Cymru Gydnerth yn gofyn bod yr holl asiantaethau perthnasol yn canolbwyntio ar hyn. Ffurfiwyd grŵp tasg a gorffen yn sgil hynny dan gadeiryddiaeth Asiantaeth Cefnffyrdd Gogledd a Chanolbarth Cymru. Bu'r Gwasanaeth yn gweithio â Llywodraeth Cymru ac amryw asiantaethau wrth ymchwilio i swyddogaeth y llywodraeth mewn sefyllfa o'r fath a'r gwaith a gâi ei wneud i liniaru ar y risg. Mae'r gwaith yn dod yn ei flaen a disgwylir y bydd cynllun ar waith cyn diwedd y flwyddyn.

Ffliw Adar

Cafwyd brigiad o achosion o fflw adar mewn nythfeydd adar y môr ar Ynys Môn ym mis Awst 2023. Casglwyd mwy na 1,200 o adar yn gelain. Nid oedd prif gontractwr gwastraff yr awdurdod lleol yn meddu ar y trwyddedau angenrheidiol nac wedi'i hyfforddi i gasglu Sgil-gynhyrchion Anifeiliaid Categori 1. Sefydlwyd contract dros dro â chontractwr arall a fedrai gasglu'r adar. Bu'r Gwasanaeth yn cymryd rhan mewn cyfarfodydd a thrafodaethau â Chyngor Sir Penfro, a fu'n delio ag achosion tebyg. Drwy hynny bu modd rhannu gwersi a ddysgwyd ac arferion gorau. Bu'r Gwasanaeth hefyd yn cymryd rhan yng nghyfarfodydd wythnosol Llywodraeth Cymru ynglŷn ag adar y môr. Gofynnwyd i Brifysgol Bangor am unrhyw wybodaeth neu batrymau oedd wedi dod i'r amlwg o ran afiechydon yr adar ar Ynys Seiriol ac Ynysoedd y Moelrhoniaid.

Parhad Busnes

Mae holl wasanaethau'r Cyngor bellach wedi llenwi'r templed newydd ar gyfer parhad busnes. Bu'r Gwasanaeth yn cynorthwyo'r Cyngor wrth gynnal ymarferion ar

gyfer y cynlluniau, drwy ddatblygu a hwyluso sesiynau pwrpasol. Gwneir cofnod ar fatrics hyfforddiant o'r holl staff sy'n cymryd rhan yn yr ymarferion ac yn eu cwblhau. Bydd yr ymarfer hefyd yn casglu sylwadau gan staff ynglŷn â'r modd yr ymatebir i ddigwyddiadau a phethau y gellid eu gwella, a bydd awdur y cynllun yn ystyried y sylwadau hynny wedyn. Mae'r gwasanaeth hefyd yn holi gwasanaethau ynglŷn ag unrhyw hyfforddiant neu ymarferion eraill y gallai fod angen eu cynnal.

- Mae'r Gwasanaeth yn meithrin cyswllt â Grŵp Cyngori ar Ddiogelwch y Cyngor, sy'n cynorthwyo'r swyddog dyletswydd ar alwad.
- Cyflwynodd y Gwasanaeth sesiwn briffio i aelodau ynglŷn â swyddogaeth y Gwasanaeth a chynllunio rhag argyfwng.
- Mae'r Gwasanaeth yn dal i gynorthwyo'r Cyngor gyda'r Ymchwiliad COVID-19.
- Mae cyrsiau e-ddysgu'r Gwasanaeth yn darparu gwybodaeth gyson i staff ynglŷn â'i swyddogaethau a chyfrifoldebau ym maes cynllunio rhag argyfwng ac ymateb i ddigwyddiadau.

Gwaith sydd wedi'i gynllunio ar gyfer blwyddyn ariannol 2024/2025

- Dal i gefnogi parhad busnes.
- Ystyried 'Cynllun Digwyddiadau' i'r Cyngor ar gyfer y ddwy bont yn cau.
- Penodi cofnodwr ymhob gwasanaeth a'u cefnogi drwy hyfforddiant ac ymarferion.
- Darparu cymorth gyda Chyfraith Martyn a chefnogi awdurdodau lleol i fod yn barod ar ei chyfer.
- Gweithio ar y camau gweithredu a'r heriau sy'n deillio o ymarfer Mighty Oak (colli trydan).
- Adnabod unrhyw anghenion hyfforddiant yn sgil yr ymarferion parhad busnes.
- Sefydlu cylch blynyddol o ymarferion ar y trefniadau parhad busnes.

Cyngor Gwynedd

Gwaith a gyflawnwyd ym mlwyddyn ariannol 2023 to 2024

Sefydlwyd tîm rheoli argyfyngau ac is-grwpiau yng Ngwynedd a threfnir cyfarfodydd rheolaidd. Yn y cyfarfodydd hynny, darperir y wybodaeth ddiweddaraf ynglŷn â chynnydd yr is-grwpiau ar waith a chynlluniau mewnol ac mae'r Panel Strategol yn darparu cefnogaeth, arweinyddiaeth a chyfarwyddyd.

Bu'r Gwasanaeth yn cynorthwyo Gwynedd ag amryw ddigwyddiadau, gan gynnwys hofrennydd Chinook yr Awyrlu Brenhinol a laniodd mewn cae yn Arthog fis Gorffennaf 2023, gollyngiad olew palmwydd ar draeth y Bermo, tân mewn tŷ yn Hirael, Bangor, amryw danau gwyllt yn y sir, tywydd garw, cynnal a chadw pontydd a nifer o alwadau gan Heddlu Gogledd Cymru am gymorth gyda ffermydd canabis.

Wedi sefydlu rota Aur newydd yng Ngwynedd, datblygodd y Gwasanaeth ymarfer pen desg a gynhaliwyd ym mis Hydref 2023, yn ymdrin â sefyllfa lle'r oedd tŷ ar dân yng Nghaernarfon. Y nod oedd ymchwilio i'r prosesau oedd ar waith a ffyrdd y gellid eu gwella eto.

Clustnodwyd safleoedd i gynorthwyo Dŵr Cymru wrth agor gorsafoedd dŵr cyhoeddus mewn argyfwng.

Gwaith sydd wedi'i gynllunio ar gyfer blwyddyn ariannol 2024/2025

Mae templed y Cynllun Parhad Busnes wedi'i gymeradwyo. Bydd y Gwasanaeth yn cynorthwyo gwasanaethau i lenwi'r ddogfen cyn cadarnhau'r cynlluniau a chynnal ymarferion yn eu cylch.

Addaswyd cynnwys a lleoliadau'r blychau yn y Canolfannau Gorffwys a'r rhestr o gysylltiadau a chynhelir ymarferion ffurfiol ar gyfer y Canolfannau Gorffwys ymhob awdurdod.

Mae'r Gwasanaeth yn cymryd rhan mewn cyfarfod yn y Friog ddwywaith y flwyddyn. Mae gwaith yn mynd rhagddo â Grŵp Gweithrediadau'r Friog i ddatblygu a sefydlu cynllun gwacau oherwydd y perygl o lifogydd.



Cyngor Bwrdeistref Sirol Wrecsam

Gwaith a gyflawnwyd ym mlwyddyn ariannol 2023/2024

Cymorth gan y Gwasanaeth yng nghyfarfodydd y Grŵp Cyngori ar Ddiogelwch

Cymryd rhan yng nghyfarfodydd misol y Grŵp a chyfrannu fel y bo'n briodol o safbwynt Cynllunio rhag Argyfwng. Darperir cefnogaeth â chyfarfodydd y Grŵp Cyngori ar Ddiogelwch ar gyfer Clwb Pêl-droed Wrecsam.

Mae staff CBS Wrecsam wedi mabwysiadu'r templed newydd ar gyfer Cynlluniau Parhad

Gwasanaeth ac wrthi'n trosglwyddo'r wybodaeth angenrheidiol o'r hen gynlluniau. Cynhaliwyd cyfarfod â phob cynrychiolydd i egluro'r cynlluniau newydd. Mae gwaith wedi dechrau ar gynnal Ymarfer Parhad Gwasanaeth unwaith y mae'r cynlluniau wedi'u cwblhau - gweithio ochr yn ochr â staff CBSW i lunio ymarfer addas y gellir ei ddefnyddio i brofi unrhyw Gynllun Parhad Gwasanaeth.

Cynhelir cyfarfodydd â Llywodraeth Cymru ynglŷn â Thomenni Glo, sy'n galluogi'r Gwasanaeth i weld yr hyn sy'n digwydd mewn rhannau eraill o Gymru ac adnabod arferion gorau. Lluniwyd templed ar gyfer Cynlluniau Tomenni Glo, a gaiff ei ddatblygu'n gynllun drafft i'w rannu â chydweithwyr yn Wrecsam.

Mae **Is-grwpiau Templed Estynedig Adrodd** ar Fwynau yn cwrdd unwaith bob chwarter gyda chymorth y Gwasanaeth. Mae'r strwythurau ar gyfer ymateb ac adfer wedi'u sefydlu ac mae'r is-grwpiau'n cwrdd yn rheolaidd.

Bu'r Gwasanaeth yn cynorthwyo Wrecsam wrth ymateb i'r digwyddiadau canlynol:

- **Lori ar Dân ar yr A525 fis Mehefin 2023** - cymryd rhan mewn cyfarfodydd amlasiantaethol a meithrin cyswllt rhwng CBSW a sefydliadau eraill ar gais.
- **Posibilrwydd o wacau Llety Myfyrwyr fis Hydref 2023** - meithrin cyswllt â'r Tîm Cymorth Dyngarol i agor Canolfan Orffwys ac yna'i chau ar gais Heddlu Gogledd Cymru.
- **Tân yng Nghanolfan Fusnes Bryn fis Chwefror 2024** - bu Swyddog ar Ddyletswydd yn cynorthwyo i feithrin cyswllt rhwng Gwasanaeth Tân ac Achub Gogledd Cymru a CBSW.

Grŵp Parodrwydd Mannau Cyhoeddus Wrecsam

cymryd rhan mewn cyfarfodydd a darparu cymorth yn ôl y gofyn.

Gwaith sydd wedi'i gynllunio ar gyfer blwyddyn ariannol 2023/2024

Ymarferion Parhad Gwasanaeth

Wedi i'r gwasanaethau gymeradwyo'r holl gynlluniau newydd, cynhelir ymarferion i'w rhoi ar brawf. Mae gwaith yn mynd rhagddo â Chadeirydd y Tîm Parhad Gwasanaeth i sicrhau bod y cynlluniau'n adlewyrchu'r gwersi a ddysgwyd.


Datblygu a chyflwyno ymarferion micro i'r Tîm Rheoli Ymateb i Argyfwng a'r holl is-grwpiau er mwyn sicrhau bod y strwythur ar gyfer ymateb yn gadarn ac wedi'i brofi

Trefnu ymarfer prawf ar y cyd â Chadeirydd y Tîm y byddai modd i'r holl is-grwpiau ei efelychu wrth roi eu strwythurau ar brawf.

Hyfforddi staff Canolfannau Gorffwys yn dilyn ymgyrch recriwtio

Trafodaethau o amgylch bwrdd i egluro prosesau Canolfannau Gorffwys a swyddogaethau'r staff er mwyn sicrhau darpariaeth ledled y Fwrdeistref - cynhelir adolygiad blynyddol i sicrhau bod pob lleoliad yn addas at y diben ac ar gael i'w ddefnyddio fel canolfan orffwys.

Adolygu a diwygio'r holl gynlluniau angenrheidiol i sicrhau bod CBSW yn lliniaru ar yr *holl risgiau*. Wedi gwneud hynny, sicrhau bod yr holl staff yn gwybod am unrhyw newidiadau ac yn cymryd rhan mewn ymarferion lle bo angen.



Cyngor Sir Ddinbych

Gwaith a gyflawnwyd ym mlwyddyn ariannol 2023/2024

Yn 2023, aeth y Cyngor ati i ailstrwythuro ei uwch dîm arwain a gwasanaethau corfforaethol yn helaeth. Yn sgil hynny penodwyd nifer o wahanol bobl yn Gadeiryddion ac Is-gadeiryddion y Tîm Rheoli Argyfwng Strategol. Darparwyd hyfforddiant trylwyr i'r Cadeiryddion ac Is-gadeiryddion newydd.

Yn sgil y llifogydd difrifol ym mis Hydref yn ystod Storm Babet, trefnodd y Gwasanaeth asesiad o'r digwyddiad a gyflwynwyd i'r Tîm Rheoli Argyfwng Strategol, ac mae'r argymhellion wedi'u rhoi ar waith er mwyn gwella ein hymateb i ddigwyddiadau yn dyfodol.

Mae cofnodwyr yn prinhau oherwydd trosiant staff ac nid oedd y drefn yn gadarn mwyach. Mae'r Tîm Gwybodaeth Argyfwng Corfforaethol wedi adnabod carfan newydd o gofnodwyr sy'n creu mwy o gadernid a pharhad.

Yn sgil yr ymarfer pen desg ynglŷn â chanolfannau gorffwys, cydnabu'r Cyngor fod angen cynnal ymarfer byw er mwyn profi ei gynllun ymhellach. Trefnodd y Gwasanaeth ymarfer byw mewn ar 15 Chwefror 2024 yng Nghanolfan Hamdden y Rhyl. Tîm Cymorth Dyngarol Sir Ddinbych a fu'n arwain yr ymateb. Cymerodd mwy na hanner cant o bobl ran yn ystor y diwrnod. Bu'r ymarfer yn destun canmoliaeth a lluniwyd adroddiad yn amlygu arferion da Sir Ddinbych ac yn argymhell gwelliannau i'r dyfodol.

Gwaith sydd wedi'i gynllunio ar gyfer blwyddyn ariannol 2024/2025

- Sicrhau y defnyddir y templed Cynllun Parhad Busnes yn yr holl wasanaethau ac y cynhelir ymarferion fel y bo'n briodol.
- Dal i hybu datblygiad y Cadeiryddion ac Is-gadeiryddion newydd yn strwythur y Tîm Rheoli Argyfwng Strategol.
- Cynnal ymarferion â'r Tîm Rheoli Argyfwng Strategol a'r holl is-grwpiau er mwyn sicrhau ymateb cydlynol ac adnabod unrhyw anghenion am hyfforddi a datblygu ymhellach.



Cyngor Sir y Fflint

Gwaith a gyflawnwyd ym mlwyddyn ariannol 2023/2024

Cefnogi'r Cyngor, ymgynghori a rhoi cyngor ynglŷn ag Argyfyngau Sifil Posibl yng nghyswllt y Tîm Adsefydlu Ceiswyr Lloches yn Sir y Fflint.

Mae'r Gwasanaeth wedi trefnu nifer o ymweliadau i ymgyfarwyddo â safleoedd Rheoli Peryglon Damweiniau Mawr, gan gynnwys canolfan ddisbarthu Great Bear ac FMC Agro yng Nglannau Dyfrdwy. Rhoddwyd canmoliaeth i'r ymweliadau hynny.

Trefnodd Cyngor Sir y Fflint ymarfer Dosbarthu Dŵr mewn Argyfwng gyda Dŵr Cymru ar 29 Mehefin 2023. Bu'n fodd o ymarfer ymateb y Cyngor a sicrhau bod ganddo drefniadau cadarn ar gyfer digwyddiad sy'n amharu ar gyflenwadau dŵr.

Bu'r Gwasanaeth yn cynorthwyo Sir y Fflint yn ystod amryw ddigwyddiadau'r tywydd, gan gynnwys:

- 1) Storm Larissa (9-12 Mawrth 2023)
- 2) Storm Babet (19-21 Hydref 2023)
- 3) Rhybudd oren oherwydd eira (Chwefror 2024).

Trefnodd y Gwasanaeth adroddiadau ar ôl y digwyddiadau hyn i'w cyflwyno i'r Tîm Rheoli Ymateb i Argyfwng ac mae'r gwersi a ddysgwyd wedi arwain at ymateb mwy cadarn.

Gwaith sydd wedi'i gynllunio ar gyfer blwyddyn ariannol 2024/2025

- Mae'r Tîm Cymorth Dyngarol yn bwriadu cynnal ymarfer arall ym mis Awst 2024 ar ôl yr Ymarfer Canolfannau Gorffwys ym mis Tachwedd 2022.
- Adolygu staff cefnogol Canolfannau Gorffwys Cyngor Sir y Fflint a dadansoddi'r anghenion hyfforddiant.
- Darparu hyfforddiant i aelodau o'r tîm gweithredol ynglŷn â safleoedd Rheoli Peryglon Damweiniau Mawr mewn amryw fannau yn Sir y Fflint.



- Bydd y Grŵp Parhad Busnes yn adolygu'r Cynlluniau Parhad Gwasanaeth ar gyfer 2023.
- Llunio drafft o Gynllun Cyngor Sir y Fflint ar gyfer Ymateb ac Adfer yn sgil Seibrddigwyddiadau.
- Mae angen cynnal adolygiad o leoliadau Canolfannau Gorffwys, fel y nodwyd yn yr adroddiadau yn sgil Storm Babet a'r llifogydd yn Ffynngroyw.
- Mae pecyn hyfforddiant newydd ar y gweill ar gyfer Rheolwyr Canolfannau Gorffwys, yn dilyn cymharu'r hyfforddiant â'r hyn y mae Timau Cynllunio rhag Argyfwng awdurdodau lleol eraill yn ei ddarparu.
- Mae gwaith yn mynd rhagddo i gasglu gwybodaeth HAVG ar gyfer mapio data ar JIGSO.

Gwaith ar Reoli Peryglon Damweiniau Mawr, Piblinellau a Safleoedd Niwclear

Gwaith a gyflawnwyd ym mlwyddyn ariannol 2023/2024

Cynlluniau ac Ymarferion Rheoli Peryglon Damweiniau Mawr

- Cydlynu a gweithredu'r amserlen ar gyfer cynlluniau amlasiantaethol rhag argyfwng ac ymarferion, yng nghyswllt canolfan ddosbarthu Great Bear ac FMC Agro, i sicrhau bod yr awdurdod lleol yn cydymffurfio â Rheoliadau Rheoli Peryglon Damweiniau Mawr 2015. Wrth ddarparu'r amserlenni hynny, adolygwyd Cynlluniau rhag Argyfwng Allanol Cyngor Sir y Fflint ar gyfer y safleoedd hynny, a chyhoeddwyd rhai diwygiedig.
- Cynrychioli'r Gwasanaeth;
 - Mewn cyfarfod o Awdurdodau Cymwys y rhanbarth i drafod cydymffurfiaeth â'r Rheoliadau Rheoli Peryglon Damweiniau Mawr.
 - Mewn cyfarfod o Grŵp Cenedlaethol Awdurdodau Lleol i rannu Arferion Da wrth Reoli Peryglon Damweiniau Mawr.

Cynlluniau ac Ymarferion yng nghyswllt Piblinellau â Pheryglon Damweiniau Mawr/Rheoliadau Diogelwch Piblinellau

Gweithio a gweithredwyr piblinellau pwysedd uchel a darpar weithredwyr er mwyn sicrhau cydymffurfiaeth â'r rheoliadau yn y chwech o awdurdodau lleol yng ngogledd Cymru:

- Meithrin cyswllt ag Uniper UK ac ENI LBOC i gytuno ynghylch y newidiadau sydd eu hangen yng Nghynlluniau Cyngor Sir y Fflint ar gyfer Piblinellau â Pheryglon Damweiniau Mawr, o safbwynt datblygiadau yn yr isadeiledd o biblinellau pwysedd uchel sy'n cludo nwy.
- Dal i fonitro ac adolygu gwaith achosion yr Arolygiaeth Gynllunio genedlaethol ym maes Isadeiledd Piblinellau Dal a Storio Carbon Hynet, sy'n brosiect isadeiledd o bwys cenedlaethol.



Cynlluniau ac Ymarferion ar gyfer Safleoedd Niwclear/y Rheoliadau (Parodrwydd a Gwybodaeth Gyhoeddus) Argyfyngau Ymbelydrol

Monitro ac adolygu'r ddeddfwriaeth ynghylch cynllunio rhag argyfwng yng nghyswllt safleoedd niwclear, i gynorthwyo'r awdurdodau lleol i ddal i gydymffurfio â'r rheoliadau:

- Datblygu fframwaith rhanbarthol i gynghori awdurdodau lleol ynghylch ymateb i ddiwyddiadau niwclear, er mwyn sicrhau y cydymffurfir â Rheoliadau (Parodrwydd a Gwybodaeth Gyhoeddus) Argyfyngau Ymbelydrol 2019 (Rheoliad 22).

- Dal ati i gynrychioli'r Gwasanaeth mewn cyfarfodydd budd-ddeiliaid i drafod datgomisiynu gorsafoedd ynni'r Wylfa a Thrawsfynydd.
- Dal i gynrychioli'r Gwasanaeth ar y cyrff cenedlaethol canlynol:
 - Gweithgor Niwclear Awdurdodau Lleol.
 - Gweithgor Fforwm Cynghori ar Waddol Niwclear.

Gweithgorau Amlasiantaethol Rhanbarthol

Dal i gefnogi awdurdodau lleol gogledd Cymru yn y grwpiau canlynol sy'n rhan o Fforwm Lleol Cymru Gydnerth y Gogledd:

- Grŵp Isadeiledd a Pharodrwydd Logistaidd.
- Gweithgor Peryglon Technoleg â Batris Li-Ion.
- Gweithgor Dosbarthu Dŵr mewn Argyfwng.
- Grŵp Cau Pontydd Afon Menai.
- Grŵp yr Amgylchedd.
- Gweithgor Cynlluniau ac Ymarferion Tanau Gwylt.
- Gweithgor Ymateb i Ddigwyddiadau Morol (Cwch Pleser yn Suddo).

Gwaith sydd wedi'i gynllunio ar gyfer blwyddyn ariannol 2024/2025

Cynlluniau ac Ymarferion Rheoli Peryglon Damweiniau Mawr

- Cydlynu a gweithredu'r amserlen ar gyfer cynlluniau amlasiantaethol rhag argyfwng ac ymarferion yng nghyswllt Synthite Ltd, gan gynnwys adolygu Cynllun rhag Argyfwng Allanol Cyngor Sir y Fflint ar gyfer y safle, a chyhoeddi un diwygiedig.
- Adolygu ac ailgyhoeddi cynlluniau amlasiantaethol Cyngor Sir y Fflint a Chyngor Bwrdeistref Sirol Wrecsam ar gyfer FMC Agro, Great Bear a Kronospan.

Cynlluniau ac Ymarferion yng nghyswllt Piblinellau â Pheryglon Damweiniau Mawr/Rheoliadau Diogelwch Piblinellau

- Adolygu'r Cynlluniau ar gyfer Piblinellau â Pheryglon Damweiniau Mawr sydd gan Uniper UK, ENI LBOC, National Gas a Wales & West Utilities yn y chwech o awdurdodau lleol.
- Cydlynu a chynnal digwyddiad i godi ymwybyddiaeth o Gynlluniau ar gyfer Piblinellau â Pheryglon Damweiniau Mawr ymysg y chwech o awdurdodau lleol.
- Cydlynu a chynnal ymarferion argyfwng amlasiantaethol gydag Uniper UK a National Gas.
- Cydlynu astudiaeth dichonolrwydd amlasiantaethol gydag ENI LBOC i ganfod a fyddai datblygu piblinell carbon deuocsid Hynet yn Sir y Fflint yn creu'r gofyn am Gynllun ar gyfer Piblinell â Pheryglon Damweiniau Mawr; mae tebygolrwydd o'r perygl o ddamwain fawr yn gysylltiedig ag isadeiledd gweithredol ar gyfer carbon deuocsid, ond nid yw'r Rheoliadau Diogelwch Piblinellau cyfredol (1996) yn ei wneud yn ofyniad statudol i lunio cynlluniau rhag argyfwng yng nghyswllt cludo carbon deuocsid dan wasgedd.

Cynlluniau ac Ymarferion ar gyfer Safleoedd Niwclear/y Rheoliadau (Parodrwydd a Gwybodaeth Gyhoeddus) Argyfyngau Ymbelydrol

- Datblygu fframwaith rhanbarthol i gynghori awdurdodau lleol ynghylch ymateb i ddigwyddiadau niwclear, er mwyn sicrhau y cydymffurfir â Rheoliadau (Parodrwydd a Gwybodaeth Gyhoeddus) Argyfyngau Ymbelydrol 2019 (Rheoliadau 19 a 22).

Gweithgorau Amlasiantaethol Rhanbarthol:

- Gweithgor Dosbarthu Dŵr mewn Argyfwng - cyfrannu at gwblhau cynlluniau Dŵr Cymru a Hafren Dyfrdwy ar gyfer dosbarthu dŵr mewn argyfwng (dan eu harweiniad hwy).
- Grŵp Cau Pontydd Afon Menai - cyfrannu at ddatblygu fframwaith amlasiantaethol ar gyfer y risg hon gyda Chynghorau Ynys Môn a Gwynedd (dan arweiniad Asiantaeth Cefnffyrdd Gogledd a Chanolbarth Cymru).
- Grŵp Cynlluniau ac Ymarferion Tanau Gwylt - cyfrannu at gynnal ymarfer tân gwylt ac adolygu'r cynllun amlasiantaethol presennol (gan arweiniad Gwasanaeth Tân ac Achub Gogledd Cymru).
- Gweithgor Ymateb i Ddigwyddiadau Morol (Risg o Gwch Pleser yn Suddo) - cyfrannu at ddatblygu cynllun ymateb morol amlasiantaethol ar gyfer y risg hon ar y cyd ag awdurdodau lleol ar yr arfordir (dan arweiniad Gwylwyr y Glannau).
- Gweithgor Peryglon Technoleg â Batris (Iliniaru ar risgiau damweiniau cerbydau trydan / Systemau Storio Ynni mewn Batris ar lefel y Grid Cenedlaethol) - cyfrannu at y maes newydd hwn o safbwynt cynllunio amlasiantaethol, gyda'r chwech o awdurdodau lleol (dan arweiniad Gwasanaeth Tân ac Achub Gogledd Cymru).



Targedau 2024/2025

Cronfa Ddata Hyfforddiant

Bydd y gronfa ddata'n darparu cofnod trylwyr a chyfoes o'r hyfforddiant a datblygu a gwblhawyd gan bawb sy'n ymwneud â Chynllunio rhag Argyfwng ledled gogledd Cymru. Mae'r gronfa ddata bron yn barod ond bu'n rhaid oedi cyn bwrw ymlaen oherwydd blaenoriaethau'r tîm Datrysiadau Busnes TG. Adolygu'r Strategaeth Dysgu a Datblygu.

Buom yn cynorthwyo Heddlu Gogledd Cymru wrth ddatblygu Cynllun Canolfan Dderbyn yng nghyswllt Caethwasiaeth Fodern. Datblygir ymarfer pen desg i sefydlu'r cynllun a'i roi ar brawf.

Ymarfer Adfer

wedi adolygu'r Cynllun Adfer, rydym yn bwriadu cynnal ymarfer pen desg i roi prawf arno.

Mae'r tîm Cynllunio rhag Argyfwng wedi datblygu pecyn o sefyllfaoedd posib o ran parhad busnes ar ôl cwblhau a sefydlu'r Cynlluniau Parhad Busnes, ac mae'r rheiny'n barod i'w darparu.

Cynlluniau

Cynllun Adfer Fforwm Lleol Cymru Gydnerth y Gogledd

Cynhaliwyd adolygiad o'r cynllun a darparwyd drafft i'r chwech o awdurdodau lleol er ymgynghoriad a sylw. Ar ôl cymeradwyo'r cynllun, cynhelir prawf arno drwy ymarfer pen desg.

Cynllun Llygredd Arfordirol Fforwm Cymru Gydnerth y Gogledd

Gan fod llygredd arfordirol yn un o'r risgiau yn y Gofrestr Risg, mae'r Gwasanaeth wrthi'n llunio cynllun llygredd arfordirol drafft. Mae hyn hefyd wedi'i gynnwys yn rhaglenni cyfarfodydd Grŵp yr Amgylchedd.

Parhad Busnes a'r Sector Gwirfoddol

Mae'r Gwasanaeth wedi creu canllaw i gynorthwyo busnesau bach a chanolig i ddatblygu dulliau o ymateb i ddigwyddiadau aflonyddol a rheoli eu heffaith ar eu busnesau. Bydd y canllaw ar gael ar wefannau'r awdurdodau lleol a bydd HAVG yn ei rannu ymysg cysylltiadau ym myd busnes.

Agweddau Dynol ar Ymateb i Argyfwng

Lluniwyd y ddogfen hon fel rhestr wirio i'w defnyddio wrth ystyried sut i gynllunio ar gyfer yr agweddau dynol ar ddigwyddiadau mawr ac argyfyngau ac ymateb iddynt. Mae agweddau dynol yn golygu pobl – goroeswyr, teuluoedd, ffrindiau, pobl wedi'u symud o'u lle fel ffoaduriaid, cymunedau ac ymatebwyr. Mae darparu cymorth dyngarol amlasiantaethol yn brydlon ac mewn ffyrdd addas yn helpu pobl i adfer yn gynt a gall liniaru ar rai o'r effeithiau hirdymor.

Blaenoriaethau i'r dyfodol

Cefnogi'r chwech o awdurdodau lleol yng ngogledd Cymru a'u cynghori ynghylch gweithredu Cyfraith Martyn. Bydd y gyfraith arfaethedig hon ar gyfer y Deyrnas Unedig gyfan yn hybu diogelwch a pharodwydd sefydliadau drwy fynnu, am y tro cyntaf erioed, bod y bobl sy'n gyfrifol am rai safleoedd a digwyddiadau penodol yn ystyried y risg o ran terfysgaeth a sut fyddent yn ymateb i ymosodiad.

Sefydlu Gweithwyr

Lluniwyd llyfryn i aelodau newydd o'r tîm er mwyn sicrhau cysondeb yn y wybodaeth a gyflwynir iddynt.

